

თ ი ნ | წ წ | ა ა |

ბიბლიური ანთროპოგონიის ფოლკლორული ტრანსფორმაცია

ანთროპოგონია, როგორც კოსმოგონიის ერთ-ერთი მნიშვნელოვანი ნაწილი, ფოლკლორში, როგორც მოსალოდნელი იყო, კოსმოგონიურ გადმოცემებთან კავშირში გვხვდება. რამდენადაც ქართულ ფოლკლორში ძირითადად ბიბლიური შესაქმის მოტივები მეორდება, შესაბამისად, ანთროპოგონიაც ბიბლიურ გადმოცემას ემყარება, ცხადია, გარკვეული ფოლკლორული ინოვაციებითა და ინტერპრეტაციებით.

როგორც ცნობილია, ქრისტიანული რელიგიის გავრცელება სხვადასხვა ხალხში პირველივე საუკუნეებში დაიწყო ქადაგებათა საშუალებით. ამ მხრივ გამონაკლისი არც საქართველო იქნებოდა და ქრისტიანობა თავდაპირველად ჩვენში სწორედ ზეპირი გზით შემოვიდოდა, რათა ნიადაგი მოემზადებინა ოფიციალური ეკლესიისთვის. ამ თვალსაზრისით, ოფიციალურ რელიგიად გამოცხადებამდე ქრისტიანობისთვის დიდი სამსახური უნდა გაეწია ქრისტიანულ ფოლკლორს, ძირითადად, ლეგენდებსა და ბიბლიური სიუჟეტების ფოლკლორულ ვერსიებს; მეტიც: წერა-კითხვის დეფიციტის პირობებში, ზეპირსიტყვიერი კულტურის როლი მეტად აქტიური იქნებოდა, ვიდრე ნებისმიერი სხვა საშუალება.

უპირველეს ყოვლისა, უნდა ითქვას, რომ კოსმოგონიის ქართულ ვარიანტებში ხშირად მამა ღმერთის ნაცვლად ქრისტე ღმერთი არის როგორც სამყაროს, ისე ადამისა და ევას შემქმნელი.¹ ეს ფაქტორი, გარდა იმისა, რომ ქართული კოსმოგონიური ფოლკლორის ქრისტიანულ ხასიათზე და ღმერთის დაკონკრეტების მცდელობაზე მიანიშნებს, მკვეთრად გამიჯნავს ქართულ ნარატივს საქართველოში ასევე მრავლად და მძლავრად წარმოდგენილი იუდეური სარწმუნოებისგან. ებრაული დიასპორა კი ძველი წელთაღრიცხვიდან იკიდებდა ფეხს საქართველოში და, სავარაუდოდ, ლეგენდებისა და თქმულებების სახით ავრცელებდა თავის სარწმუნოებას. ამიტომაც შეიძლება ითქვას, რომ ბიბლიური ფოლკლორი საქართველოში ქრისტიანობის შემოღებამდე ვრცელდებოდა და ნელ-ნელა მკვიდრდებოდა.

ბიბლიური ანთროპოგონია, როგორც შესაქმის ნაწილი, სხვადასხვა მოტივისგან შედგება. ქართულ ფოლკლორში რამდენიმე მოტივია განსაკუთრებით მნიშვნელოვანი, ამიტომ მათ ცალ-ცალკე განვიხილავთ:

ადამის შექმნა მიწისგან. ქართულ ფოლკლორში გამონაკლისის გარეშე არის გადასული ადამის მიწისგან (ზოგ ვარიანტში — თინისგან) შექმნის მოტივი: “როდესაც ადამიანები არ არსებობდნენ, ღმერთმა თქვა: მოდი, ადამიანებს გავამრავლებო. აიღო თიხა და გამოძერწა კაცი. შემდეგ ჩაბერა

¹“იოსებ ქრისტემ თინისაგან გააკეთა ადამიანი, ჩაბერა თავისი უკვდავი სული და გადექცა ადამიანად, მარა თვალები არ გაუხილაეს” (მასფა, სამტრედია, ჩამწ. ანა გეფერიძე)

თავისი უკვდავი სული, გააცოცხლა და ადამი დაარქვა”² (მასფა: თელავი, 70-იანი წწ.). პოეტურ ვარიანტებში ხაზგასმულია მისი ყვითელი ფერი:

“ძირიდგან მიწა ეილო, მიწა იყო ყვითლის ფერი.

ამას სული ჩაუბერა, - ადამ დაგდვა კაცის ფერი” (პოეზია, 1973, გვ. 102).

თავის ცნობილ წიგნში - “ფოლკლორი ძველ აღთქმაში” - ჯიმს ჯორჯ ფრეზერს ვრცელი მასალა მოჰყავს ამ საკითხთან დაკავშირებით სხვადასხვა ხალხის ფოლკლორიდან, სადაც მიწა ან თიხა ძირითადად წითელია, რითიც ესა თუ ის ეთნოსი ადამიანთა სისხლის სიწითლეს ხსნიდა (ყ. ფრეზერი, 1989, გვ. 28).³ საგულისხმოა, რომ ქართულ ტრადიციაში მიწა წითელი კი არ არის, არამედ ყვითელია, რომელსაც ადამიანის ფერი ედება ღმერთის სულის ჩაბერვით. ხოლო ლეგენდის აქარულ ვერსიაში საუბარია ადამიანის შვიდნაირი მიწისგან შექმნაზე, რითიც, სავარაუდოდ, ადამიანური ბუნების მრავალფეროვნებაა გამოხატული.⁴ ღმერთის დავალებით, წინასწარმეტყველები შვიდნაირი მიწისგან ტალახს ამზადებენ, გააკეთებენ ადამს, როგორც კაცის სურათს და შემდეგ შთაბერავენ მას სულს (ა. თანდილავა, 1990, გვ. 93-94). ასევე, ერთ-ერთ აქარულ ტექსტში, რომელსაც გ. მახარაშვილი იმოწმებს თავის სტატიაში, ღმერთმა ეზრაელს (სულთამხუთავს) უბრძანა, მიწა სხვადასხვა ადგილიდან აეღო, რათა ადამიანები ერთი ფერისანი არ ყოფილიყვნენ (გ. მახარაშვილი, 2004, გვ. 156).

აქარული ფოლკლორი. უნდა აღინიშნოს, რომ ქართულ ანთროპოგონიურ გადმოცემებში სრულიად განსხვავებული და გამორჩეულია აქარული ტექსტები, რომელთა განსხვავებულობაზე თავისი კვალი მუსლიმთა საღვთო წიგნს - ყურანს უნდა დაეჩნია.

მოსწავლე ახალგაზრდობის სასახლის ფოლკლორული არქივის აქარული “თქმულება ადამიანის გაჩენაზე”⁵ მოგვითხრობს, რომ როდესაც ღმერთმა ადამიანის შექმნა გადაწყვიტა, მიწის მოტანა ერთ მელაიქს (ანგელოზს) დაავალა. აქარული ვარიანტების უმრავლესობაში ადამიანის სხეულს მიწისგან ქმნის არა ღმერთი, არამედ მისი ბრძანებით ქმნიან მელაიქები, წინასწარმეტყველები და სხვ.⁶ თითქმის ყველა აქარულ ვარიანტში მიწა პერსონიფიცირებულია, რადგან ის უარზეა, გაჰყვეს მელაიქს იმ მიზეზით, რომ “ადამიანი ამქვეყნად რა ცოლდასაც

² “ადამი და ევა მიწითგან ყოფილან გაჩენილნი. შეხვდნენ თურე ერთმანეთს აი მიწიდან აშენებული ადამი და ევა” (თსუფა: 16466).

³ ფრეზერს ასევე მოჰყავს დასავლეთ აფრიკის გადმოცემები, რომლებშიც ახსნილია, რომ კარგი თიხისგან კარგი ადამიანი შეიქმნა, ცუდი თიხისგან – ცუდი და ა.შ. (ყ. ფრეზერი, 1989, გვ. 25).

⁴ ებრაულ ტრადიციაში ადამის სხეულის შესაქმნელად შემოქმედი მიწას სამყაროს სხვადასხვა ნაწილისგან აგროვებს, ხოლო ადამის თავისთვის მხოლოდ ისრაელის წმინდა მიწას იყენებს (მ. ვეისმანი, 1990, გვ. 53).

⁵ “ჯერ კიდევ მილიონი წლის წინათ, როცა ამქვეყნად ადამიანი არ იყო, ღმერთმა გადაწყვიტა, მიწიდან გაეკეთებინა ადამიანი...” - მთქმელი მამულ ქათამაძე, ქობულეთის რაიონის სოფ. ბობოყვათის მკვიდრი. ჩამწერი გულნარა ქათამაძე, 1970 წ.

⁶ მსგავსი მოტივი გვხვდება ანოკრიფში “იოანეს საიდუმლო წიგნი”: გაამბარტავენებული ანგელოზი – სათანაელი ქმნის ადამიანს თავისი სახის მსგავსად. შექმნა ორი ადამიანური სხეული თიხისგან და მეორე ცის ანგელოზებს უბრძანა შიგ შესვლა. შეიქმნა მამაკაცი – ადამი და ქალი – ლილითი. ისინი გამუდმებით კამათობდნენ, რადგან სათანაელის სახედ იყვნენ შექმნილნი. მათი კამათით შეწუხებული სათანაელი დააშორებს ადამსა და ლილითს და დაძინებული ადამის სხეულის ნაწილისგან ქმნის ევას (Тайная книга Иоанна - <http://derzhavarus.ru/apokrif-tainavakiga-ioanna.html> ტექსტის დამოწმება 28.06.2015).

ჩაიდენს, მე დამებრალეზაო. არც მეორე მელაიქს, სახელად ეზრაელს გამოჰყვა მიწა, რომელიც გაბრაზდა, ერთ გორს დაატანა ხელი და ღმერთს მიუტანა” (მასფა: ბობოყვათი, 1970).

მიწის წინააღმდეგობის მოტივი გვხვდება, ასევე, სხვა აქარულ ჩანაწერებში, რომლებიც თ. შიოშვილს მოჰყავს თავის სტატიაში.⁸ მოცემულ პასაჟს მკვლევარი ყურანს უკავშირებს.⁹ მისი აზრით, “ადამიანის გაჩენაზე უარის მოტივის ძველი ალთქმის ამბავი (პირველქმნილი ცოდვა და ძმის მიერ ძმის სისხლის დაღვრა) დაედო საფუძვლად, რადგანაც, როცა ყურანი იწერებოდა, ძველი ალთქმისეული ლეგენდები საყოველთაოდ იყო ცნობილი” (თ. შიოშვილი, 2010, გვ. 81); გ. მახარაშვილი კი ადამიანის დანიშნულებისა და მისი ზნეობრივი მისიისადმი ზეპირსიტყვიერების დამოკიდებულებით ხსნის (გ. მახარაშვილი, 2004, გვ. 156).

მიწის პერსონიფიკაციით მიწიერისა და ზეციერის, სხეულისა და სულის სუბსტანციის მკვეთრი გამოჩენა ხდება. ადამიანურ ცოდვებს მის მიწიერ ბუნებას მიაწერს ქრისტიანობაც, რაც, სხვათა შორის, სასულიერო ყანრის ხალხური ლექსების გავრცელებული თემაა და ხშირად გვხვდება ქართულ ხალხურ პოეზიაში; მაგალითად “სულისა და ხორცის ლექსში”, სადაც სულისა და ხორცის გაბაასება მოცემული, სული უჩივის ხორცს:

“მაგ მწარე ცოდვა შიგანა, მადლ ხო არ მომაკარეო.

გამგზავნე ცოდვითა სავსე, მადლისგან ცარიელიო”.

ხორცი აღიარებს თავის დანაშაულს:

“სულო, შე დაღონებულო, მეც ბევრი ავი გიყავო,

მე შენ მტრობაში ვალამე, სანამ ცოცხალი ვიყავო” (პოეზია, 1973, გვ.

166).

მიწიერისა და ზეციერის დაპირისპირება შედარებითი თეოლოგიის ერთ-ერთი საკვანძო საკითხია, რომელზეც თითქმის უსიტყვოდ თანხმდება ყველა რელიგია.

“ვქმნეთ კაცი ხატად და მსგავსად ჩვენდა”. აქარულ ვერსიაში საყურადღებოა კიდევ ერთი მოტივი, რომელიც ადამიანის ღვთის ხატად შექმნის ტრანსფორმირებულ ვერსიას წარმოადგენს: მელაიქები (ანგელოზები) ღმერთის დავალებით მიწისგან ქმნიან ტანს, მაგრამ არ შესწევთ უნარი, შექმნან თავი/სახე, რომლის შექმნაშიც თვითონ ღმერთი ერევა: “ღმერთმა მელაიქებს ადამიანის

⁷ ღმერთის მიერ დედამიწისთვის მიწის თხოვნა გაძლიერებულია მისი გასამაგებთ: ღმერთის მიერ გაგზავნილ სამ ანგელოზს მიწა უარს ეუბნება, მეოთხე ანგელოზს - ღმერთს (”ეს არის სულის ამრთმეველი”) კი ძალით მოაქვს მიწა შვიდი ადგილიდან და ასე აკეთებენ ადამიანს (ნფიბა, საქმე №133, გვ. 12-17).

⁸ ღმერთი უბრძანებს ანგელოზებს ადამიანის ტალახისგან შექმნას, მაგრამ დედამიწა სასტიკ უარს განაცხადებს, მიწას არ აძლევს ანგელოზებს და უარს ასე ასაბუთებს: “ცოდვიანი ადამიანები უნდა გაჩნდნენ და მერე ისე მერ უნდა მკლავნონო” (ნფიბა, საქმე №240, გვ. 37).

⁹ ყურანის მიხედვით, როდესაც ალაჰმა ადამიანის შექმნა გადაწყვიტა, “უთხრა (შენმა) უფალმა ანგელოზებს: მე დავადგენ ქვეყანაზე ჩემს შემცველსო. მიუხედავად - განა ადგენ შენ იქ იმას, ვინც უკეთურებას ამრავლებს მასზე და სისხლს დაღვრის მამინ, როცა ჩვენ ქებით გადიდებთ და გასაბეტაკებთო?! უთხრა — მე ვიცი ის, რაც თქვენ არ იცით!” (ყურანი II, 28).

¹⁰ გნოსტიკურ აპოკრიფებში, მაგალითად, “არქონტთა არსში” ადამიანის სხეულს არა ღმერთი, არამედ სწორედ არქონტები ქმნიან: არქონტებმა გადაწყვიტეს, შექმნათ ადამიანი მიწის ფერფლისგან მათ გამოძერწეს თავიანთი ქმნილება. ეს იყო მთლიანად მიწიერი ადამიანი. მათ სხეული გააკეთეს თავისი მსგავსი, ხოლო სახე მიამსგავსეს წყალში არკელილი ღმერთის სახეს. შექმნეს და დატოვეს მიწაზე, რადგან უსულო იყო, თვითონ კი არ შეეძლოთ მისი გატაცება (აღდგინება). ადამი მხოლოდ მას შემდეგ ცოცხლდება - სულიერი ხდება, რაც ღმერთის სული შედის მასში (СУШНОСТЬ АРХОНТОВ - www.biblicalstudies.ru/Lib/Gnosys/Archont.html ტექსტის დამოწმება 28.06.2015).

ფორმა მისცა, მაგრამ თავი ვერ გაუქეთეს. ღმერთს მოახსენეს, რომ ადამიანი კისრამდე გავაკეთეთ, მაგრამ არ ვიცით, თავი როგორ გავუქეთოთო.¹⁰ ღმერთმა თავის აგებულება თვითონ გააკეთა. ერთ მელაიქს უბრძანა სულის ჩაბერვა. ჩაუბერა მელაიქმა სული და მიწიდან გაკეთებული ადამიანი გაცოცხლდა. ღმერთმა მელაიქ ებრაელს უბრძანა: ადამიანი გავაჩინე და მისი სულის ამრთმევი შენ უნდა იყოვო (მასფა, უშიფრო ჩანაწერი, 1970 წ.).

ქართულ ხალხურ ტექსტებში ხშირად იკვეთება ბიბლიური ცოდნა ადამიანის ღვთის სახედ და მსგავსად შექმნის შესახებ, თუმცა ამ მხრივ განსხვავებულია დმანისის რაიონში ჩაწერილი “ლეგენდა ევაზე”, რომლის თანახმად, ადამსა და ევას აქვთ სახე, მაგრამ არ აქვთ ტანი: “ჯერ კიდევ, როცა ადამიანი არ იყო ჩამოყალიბებული, იყო ორი ადამიანი, ადამა და ევა, რომლებსაც ტანი არ ჰქონდათ, მარტო სახე ჰქონდათ”. ეშმაკი აცდუნებს ევას: “ეგ ყველაზე კარგი ხილია და ღმერთი თავისთვის ინახავსო. ევამ ჭამა ეს ხილი და ადამიანად იქცა. მაშინ დაინახეს ადამიანი შვილის ტანი. ამ ხნიდან ჩაეყარა საფუძველი ადამიანთა განვითარებას” (მასფა, დმანისი, 1980); აქ კარგად ჩანს, როგორი ტრანსფორმაცია განუცდია ბიბლიურ მოტივს ხალხურ ცნობიერებაში: ის თითქოს პირდაპირ არის გაგებული, მაგრამ სრულიად სხვა ლეგენდას ქმნის იმის გათვალისწინებით, რომ ამ ვარიანტში ადამი საერთოდ არ იქმნება მიწისგან.

ჯერ კიდევ ადრეულ საუკუნეებში წმინდა მამათა წერილებში შენიშნულია ბიბლიური შესაქმის ერთი ორაზროვნება: ბიბლიაში ადამიანის შექმნაზე საუბარი არის ორჯერ: პირველი - როცა ღმერთი გადაწყვეტს საკუთარ ხატად და მსგავსად შექმნას კაცი და ქმნის მას/მათ დედაკაცად და მამაკაცად: “თქვა ღმერთმა: გავაჩინოთ კაცი ჩვენს ხატად, ჩვენს მსგავსებად. ებატრონოს ზღვაში თევზს, ცაში ფრინველს, პირუტყვს, მთელს დედამიწას და ყველა ქვემძრობს, რაც კი მიწაზე დახობავს. შექმნა ღმერთმა კაცი თავის ხატად შექმნა იგი, მამაკაცად და დედაკაცად შექმნა ისინი” (დაბ. 1: 26-27) და მეორე - როცა მძინარე ადამის გვერდის გამოლებით ქმნის ევას: “უფალმა ღმერთმა ძილქუში მოჰგვარა ადამს და რა დაეძინა, გამოუღო ერთი ნეკნი და მის ადგილას ხორცი ჩაუღო. ნეკნისგან, ადამს რომ გამოუღო, დედაკაცი შექმნა უფალმა ღმერთმა და ადამს მიუყვანა” (დაბ. 2: 21-22).

ყოჩა ფრეზერი ამ ორაზროვნებას ბიბლიის რედაქტორს მიაწერს, რომელმაც ორი სხვადასხვა წყარო გააერთიანა ერთ ვერსიად (ყ. ფრეზერი, 1989, გვ. 14). მაგრამ ებრაულ მიდრაშებში, კერძოდ “ბერეშით-რაბაში” საუბარია ადამის ანდროგინულ წარმოშობაზე: “ადამი და ევა შეიქმნენ ერთიან არსებად, ზურგებით შეერთებული მხრებამდე; მაშინ ღმერთმა ისინი ცულის ერთი დარტყმით გააცალკევა”. სხვა წყაროებით კი “პირველი ადამიანი — ადამი იყო ქმარი მარჯვენა მხრიდან და ცოლი მარცხენა მხრიდან. ღმერთმა გაყო ისინი ორ ნახევრად”¹¹ (შდრ., ანდროგინის მითი პლატონის “ნადიმი” თავი XIV—XV).

ქართულ ფოლკლორშიც, ასევე, ორგვარად არის მოცემული ადამისა და ევას შექმნა: ზოგიერთ ვარიანტში ევა ადამთან ერთად იქმნება: “პირველ

¹¹ Bereshith rabba, I, 1, fol. 6, col. 2 (ტექსტი დამოწმებულია წიგნიდან - მ. ელიადე, 1998, გვ. 313/ იხ. აგრეთვე ვეისმანი, 1990, გვ. 55, 62).

¹² ჯავახური ვარიანტი: “პირველ გამხენელმა ღმერთმა ადამ, ევა გააჩინა, უკვდავების ბაღი მისცა, ორნივე ერთად დაადგინა” (პოეზია, 1973, გვ. 99).

გამხენელმა ღმერთმან ადამ, ჰევა გააჩინა” (პოეზია, 1973, გვ. 105). ეს განსაკუთრებით იმ ვარიანტებშია, რომელთა მთავარი თემა ცოდვით დაცემაა,¹² მაგრამ ვარიანტთა უმრავლესობაში შემონახულია ევას ადამის **გვერდისგან შექმნის მოტივი**, თუმცა ეს მოტივი ტექსტებში გვხვდება როგორც გვერდის, ასევე ნეკნის/წიბოს ვარიანტით:

“მასუჟან კიდევ უხერხეს, მას ამოსჭრედ გვერდის წყნელი,

ადამს უწოდეს ცოლათა, არვინ იყო მისი მდრელი” (პოეზია, 1973, გვ.

102).

ქართულ ფოლკლორში მრავლადაა წარმოდგენილი ღმერთის მიერ ადამისთვის ევას შექმნის მოტივაცია, რაც ბიბლიაშივე არის გამოკვეთილი: “და თქვა ღმერთმან: არა კეთილს არს ყოფად კაცისა ამის მარტოსა. უქმნეთ მავას შემწე, მსგავსი მავისი” (დაბ. 2:18). თეოლოგ თ. ბუაძის ახსნით, “ეს მუხლი ნათლად მიანიშნებს, რომ ბოროტების ერთ-ერთი უმნიშვნელოვანესი გამოვლინება მარტობაში, იზოლაციაში, დაყოფასა და ფრაგმენტულობაში მდგომარეობს” (თ. ბუაძე, 2014, გვ. 9).

ადამის მარტობა ფოლკლორში საკმარის საფუძველს ქმნის, რათა გამოიხატოს ღმერთის თანაგრძნობა ადამის მარტობის გამო. აქვე აღვნიშნავთ, რომ ფოლკლორული მოტივაციები უფრო ხშირად პროზაულ ვარიანტებში გვხვდება, როდესაც მთქმელს ახსნა-განმარტების მეტი საშუალება აქვს და, შესაბამისად, მეტი ცვლილება შეაქვს თხრობაში, რაც, ხშირ შემთხვევაში, სწორედ მის სუბიექტურ აღქმაზე დამოკიდებული: “ახლა თქვა ღმერთმა: - ცოდოა, მოსწყინდა ამ კაცს მარტოკა, მოდი, თანაშემწედ დედაკაცს მივუჩინო. დააძინა ეს კაცი, გამოუჭრა მარჯვენა გვერდი, გააკეთა მისგან ქალი, ისიც სამოთხეში დაასახლა და უწოდა ევა (თსუფა, 13401),¹³ აჭარულ ვარიანტში ადამი თვითონ სთხოვს ღმერთს, ვინმე დამლაპარაკებელი გაუჩინოს ღმერთმა. ასევე, თვითონ სთხოვს მეუღლის გაჩენას მესხური პოეტური ვარიანტის მიხედვით:

“ღმერთმა ადამსა უბრძანა: - რათ არ მისცემ სახელებსა?

- სახელები ვინ მოსთვალოს, მე დავეძებ მეუღლესა.

ყველა ცხოველს თავისი ჰყავს, არ მიეცი პირმეტყველსა” (პოეზია, 1973, გვ.

97).

ადამისა და ევას ფიზიკური მდგომარეობა. მესხური ჩანაწერი მოგვითხრობს, რომ ადამი და ევა “ნათლით დადიოდნენ სამოთხეში, ეს ხილი რომ შეჭამეს თვალები აეხილათ” (თსუფა: 3684),¹⁴ ხოლო პროზაული რაჭული ვარიანტის მიხედვით — “ღვატლით იყვენ შემოსვილი, როგორც ფრინველია ახლა. ღმერთმა შეიყვანა სამოთხის ბაღში ადამ და ევა. მათ არ ჰქონდათ

¹³ “ადამი მარტო დაიარებოდა, ღმერთმა თქვა: ცოდოა მარტო რომ დადის, ამხანაგს გავუჩინო. დაიწყო ქალის გამოძერწა. ადამს მარცხენა მხარი ჩამოაჭრა და ქალს გადაუჩერგა, რადგან ქალი მისი მონა უნდა ყოფილიყო. მასაც ჩაბერა თავისი უკვდავი სული და ისიც გააცოცხლა, მან ქალს ევა დაარქვა” (მასფა: თელავი, 70-იანი წწ.);

¹⁴ ასევე მესხური: “პირველად, სულ პირველად ერთი სხვა ღმერთი იყო. ამ ღმერთმა გააჩინა ადამ და ჰევა. მათ მისცა სამყოფელად ედემის ბაღი და უთხრა, რომ ეს იქნება თქვენნი ადგილსამყოფელი. და იყვნენ შიშვლები, მხოლოდ ნათელი ებურათ” (მასფა: ადიგენი); “შეჭამეს და გასცინდათ ნათელი” (თსუფა: 13401); რაჭული პოეტური ვარიანტი: “ადამ ნათლით შემოსილსა არ უნდოდა ტანსაცემლი” (პოეზია, 1973, გვ. 102).

თვალეტი და უთხრათ: მე წავალ და იაგუნდი თვალეტი მოგიტანთო, რო ერთმანეთის არ შეგშურდეთო. გველი იყო და იმას უთხრა კლიტეში გეეყარეო. ღმერთი რო წამოვიდა, იმათთან მივიდა გამოვარდნილი ეშმაკი და უთხრა: სისოო, გააღე კარებიო. ვინა ხარაო, - კითხეს. მამა ღმერთი მოვედიო. სისომ კარები გააღო და სამივეს შეაჭამა ხილი, რომელიც ღმერთისგან აკრძალული ჰქონდათ და **სამივეს გაცვდათ ღვატლი**” (თსუფა, 25801).

გველი, ადამიანების მსგავსად, ღვატლით არის შემოსილი და რაჭულ, როგორც პოეტურ ისე პროზაულ, ვარიანტებში ის სამოთხის ბაღის დარაჯია. ეშმაკი მასაც ისევე აცდუნებს, როგორც ადამსა და ევას, გააღებინებს რა სამოთხის კარს ღმერთის სახელით. გველი თვითონ არის მსხვერპლი და, ამდენად, ადამიანებთან ერთად იზიარებს სასჯელს. შეიძლება ითქვას, რომ რაჭულ ვარიანტებში ნათლად ჩანს ქრისტიანულ ეგზეგეტიკაში არაერთგზის დადასტურებული მოსაზრება, რომ სინამდვილეში არა გველი, არამედ სატანა აცდუნებს ადამსა და ევას.¹⁵

ეშმაკი და არა გველი აცდუნებს ევას პ. უმიკაშვილის მიერ მესტვირე მიხილ ერადისგან რაჭაში 1875 წელს ჩაწერილ ლექსში, სადაც იესო ქრისტე “თვითონ ი ჩვენი გამჩენი” (პოეზია, 1973, გვ. 102) ბაღში დაასახლებს ადამს და ევას, ხოლო “შეკრეთ”¹⁶ (კართან მდგომი, მცველი) დაუყენებს ერთ გველს, თვითონ კი მიდის “ზმელეთი აქვს დასავლელი” (პოეზია, 1973, გვ. 102). როდესაც მასთან მიდის ეშმაკი, გველი კარს არ უღებს და ეშმაკი იძულებულია, ტანსაცმელი გამოიცვალოს (ანუ სახე შეიცვალოს) და დააჭეროს გველი, რომ ღმერთი დაბრუნდა. მხოლოდ ამის შემდეგ ალებს კარს გველი და სამოთხეში ეშმაკი შეაღწევს.

მოცემული ვარიანტი იმითაცაა საინტერესო, რომ გველის თავდაპირველი სახე მოაზრებულია ხელებითა და ფეხებით, რადგან ცოდვით დაცემის შემდეგ, მიწაზე დაგდებულ გველს ღმერთი იმით წყევლის, რომ “ალარც შეარჩინა ფეხი, ალარც შეარჩინა ხელი; მიწა მისცა საჭმელათა...” (პოეზია, 1973, გვ. 103). იუდაისტური მიდრაშის გადმოცემით, ადრე გველს ჰქონდა ორი ფეხი და ადამიანივით მოძრაობდა დედამიწაზე (მეშკოვი, გვ. 38). ამიტომ გასაკვირიც არ არის, რომ შუასაუკუნეების ევროპულ იკონოგრაფიაში გველი გამოსახულია ორ ფეხზე მდგომ არსებად, რომელიც საკუთარი ხელით აწოდებს ევას ხე ცნობადის ნაყოფს.¹⁷

რაჭულ პროზაულ ვარიანტში სამოთხის მკვიდრთა “ღვატლით”, ანუ ფრინველის ბუმბულით აღჭურვას ერთგვარი მხატვრული ღირებულებაც აქვს,

¹⁵ ამავე მოსაზრებას ემყარება ებრაული მიდრაში, რომლის თანახმად, როდესაც სამაელმა (ყველაზე დიდი ანგელოზი) გადაწყვიტა ადამის შეცდენა, თავისი მიზნისთვის აირჩია გველი. ყველაფერი, რასაც გველი ამბობდა, სამაელის მიერ იყო ჩაგონებული.

¹⁶ ღმერთის მიერ გველის ყარაულად - “შეკრედ” - დაყენებას ქართლურ პოეტურ ვარიანტშიც ვხვდებით: “შეკრედ ერთი გველი მისცა, ყარაულად დაუყენა. ქვევიდან ეშმაკი მოდის გაწუწული, ძან სველი” (სისველე წყლის, ანუ ქაოსის სტიქიას მიანიშნებს, რაც ასევე გამოკვეთილია კახურ ვარიანტში - პოეზია, 1973, გვ. 107). გველი კარს არ უღებს ეშმაკს, რადგან იუდას ამსგავსებს; ეშმაკი კი თვითონ სწყევლის გველს და სოროში ჩააფერენს (პოეზია, 1973, გვ. 106-107).

¹⁷ ებრაული მიდრაშებში გველი ისევეა იმით, რომ კარგავს ლაპარაკის უნარს, წაერთვა მას ფეხები და ხელები, კარგავს ვერტიკალურად სიარულის უნარს და მიესჯება მუცელზე ზოხვა (მ. ვეისმანი, 1990, გვ. 79-80).

რადგან ადამის პირველყოფა ფრინველთან, ზეციურ არსებებთან არის დაკავშირებული ხალხურ ცნობიერებაში. ამ მხრივ საინტერესო ინოვაციას გვთავაზობს ერთი აჭარული ჩანაწერი, რომელიც თინა შიოშვილს აქვს დამოწმებული: ტექსტის თანახმად, ადამი ზეციდან ჩამოსული დედალი მწყერით იკვებებოდა, რომელსაც ღმერთი დილა-საღამოს უჭზავნიდა. “ერთხელ ადამმა მწყერს გამოსჭრა გვერდის ნაწილი და იქედან გააყეთა მისივე მსგავსი ადამიანი — ქალი, რომელსაც სახელად ევა დაარქვა” (თ. შიოშვილი, 2010, გვ. 85).

ადამისა და ევას სიბრმავე. ადამისა და ევას ნათლით მოსილობის გარდა, ქართულ ფოლკლორში გავრცელებულია ადამისა და ევას სიბრმავის მოტივი, რაც ვარიანტების უმრავლესობაში ერთგვარ ლოგიკურ ბმას ქმნის თავდაპირველი სიშიშვლის ვერდანახვასა და ცოდვით დაცემის შემდეგ გაჩენილ სირცხვილის გრძობას შორის.

ქვეყნის გაჩენის მთიულურ გადმოცემაში ღმერთი აჩენს სამყაროს, შემდეგ თიხისგან ქმნის ადამსა და ევას ბრმებად, დაასახლებს ვენახში და ყველანაირი ნაყოფის ჭამას აუკრძალავს, თვითონ კი მიდის მათთვის იაგუნდის თვალების მოსატანად.¹⁸ ამ დროს გველი შეაჭმევს ევას ყურძენს და აეხილება თვალები (თსუფა: 4929).¹⁹

საქართველოს თითქმის ყველა კუთხეში ვხვდებით ადამისა და ევას სიბრმავეს. სხვა მთიულურ გადმოცემაშიც ადამი და ევა ბრმები არიან. მაგრამ ეს ვარიანტი იმითაა განსხვავებული, რომ დაკონკრეტებულია სატანის როლი ცოდვით დაცემის აქტში: “მცურავის” გვამში ეშმაკი შედის და “ევას ეგონა, გველი ელაპარაკებოდა და თურმე იმი(ს) მუცლიდან ეშმაკი კი ელაპარაკებოდა” (თსუფა, 4995).

ადამისა და ევას სიბრმავე გვხვდება, აგრეთვე, აპოკრიფში “ცხორებად ადამისი”, რომელსაც, როგორც ცნობილია, აკრძალულ აპოკრიფთა რიგს განაყოფნებდა ექვთიმე ათონელი. ეშმაკი მოუწოდებს ევას, მივიდეს მასთან, რადგან სათქმელი აქვს: “ჰაი შენდა დედაკაცო, რომელი-ევე ხარ სამოთხესა ფუფუნებისასა, რომელი-ევე ბრმა ხარ, მოვედ ჩემდა და გრქუა რამე სიტყუაჲ!” (ს. ყუბანეიშვილი, 1946, გვ. 9).

სიბრმავე შინაგანი ხედვის გახსნილობის მეტაფორაა და ამასთანავე შინაგანი სიწმინდისა და უმანკოების მანიშნებელია. ფოლკლორში მას უშუალოდ უკავშირდება თვალის ახელის ფაქტი და სიშიშვლის დანახვა. სიბრმავე ხალხური ვარიანტია ნათლისა, რომლითაც ადამი და ევა იყვნენ მოცული, რაჭულ

¹⁸ ადამის თვალების მოსატანად წასული ღმერთის მოტივი, გვხვდება კობტურ აპოკრიფში - “ღმერთის მიერ ადამის შექმნა”, სადაც ღმერთი მიდის, რათა ადამს თვალები მზისგან მოუტანოს https://ru.wikisource.org/wiki/Сказание_о_сотворении_Богом_Адама ტექსტის დამოწმება - 28.06.15).

¹⁹ “იოსებ ქრისტემ თიხისაგან გააყეთა ადამიანი, ჩაბერა თავისი უკვდავი სული და გადვიქცა ადამიანად, მარა თვალები არ გაუხილაეს” (მასფა: ჩამწ. ნანა გეფერიძე, სამტრედიი); “ღმერთმა შეიყვანა სამოთხის ბაღში ადამ და ევა. მათ არ ჰქონდათ თვალები და უთხრათ: მე წავალ და იაგუნდი თვალებ მოგიტანთო, რომ ერთმანეთის არ შეგშურდეთო” (თსუფა: 25801); “შაბათსა ადამი და ევა შექმნა თიხისგან, ჩაბერა სული, მაგრამა თოლები არ მისცა. უთხრა იმათა რომა: თქვენ აქ იყათ ვენახშია და არაფერი ნაყოფი არ შეჭამოთო, ვიდრე მე არ მოვალო. ღმერთსა ჭიქის თოლი უნდა მაეტანა და ჩაესო იმათთენა” (თსუფა: 4929); “ისინი ტიტვლები იყვნენ, მაგრამა სიტიტვლეს ვერ ხედავდნენ, რადგანაც ბრმები იყვნენ” (თსუფა: 4995).

ვარიანტში მას ენაცვლება “ღვატლი” — ფრინველის ბუმბული, როგორც ზეციური სხეულის სიმბოლო. სიბრძნით გადმოცემულია ის პირველქმნილი მდგომარეობა, რომელშიც ღმერთმა ადამი შექმნა და ის, როგორც ჩანს, ბიბლიაში აღნიშნულმა სიშიშვლის დანახვის ფაქტმა განაპირობა. თვალის ფიზიკური ახელა სულიერი ხედვის დახშობას მოასწავებს, რადგან დაბრძანება სულიერი ხედვის გახსნას ნიშნავს (მდრ.: ერთ-ერთ ხალხურ ნოველაში სოლომონ ბრძენი თვალს იბრძანებს, როცა მოსამართლედ აირჩევენ, რათა სამართლიანად განსაჯოს ადამიანთა ბედი).

ადამიანი — სამყაროს პატრონი. ფოლკლორში, ასევე, მოცემულია ადამიანის შექმნის მთავარი მიზანი — ის სამყაროს ბატონ-პატრონად გააჩინა ღმერთმა.²⁰ უნდა ითქვას, რომ ამ მხრივ ფოლკლორში ხაზგასმულია, რომ სატანის გაამბარტავენების და ადამიანთან დაპირისპირების მთავარი მიზეზი

²⁰ ქართლური ვარიანტის მიხედვით, ღმერთი ვაზს გააშენებს, რომელსაც ცრემლები სდის და ადამიანს ვაზის საპატრონოდ აჩენს (ნ. შამანძე, 1973, გვ. 30); ზოტურ ვარიანტში, სადაც დეტალურადაა მოცემული მნათობების, ანგელოზებისა და ეშმაკების, ცხოველთა და მცენარეთა შექმნა, ღმერთს გადაწყვეტილი აქვს, დედამიწაზე ხელიფე (პატრონი) გააჩინოს. ანგელოზი ღებხელი უჩვენებს, ეს არ გააკეთოს: “ვინ იცის, რაფერი იქნებოა, შენ რომ გაჯობოს რას შობიო. ღმერთმა მიწაც გააჩინა ადამი. სულის ჩადგამადე ეშმაკი მივიდა და ნახა რაცხა გაკეთებული დერგივით. დუშბაგუნა ხელი და თქუა: - კი გაჩთბა რაცხა ქვეყანაზე, მარა პატრონი არაფრის არ იქნებოა (არცაა პატრონი)” (თსუფა: 16155); მესხური ვარიანტი: “მათ აბარებს მთლად ედემას, აუკრძალავს ერთ რიგ ხილსა” (ბოეზია, 1973, გვ. 97); ჯავახური: “დაუმონა ყველა მხენი, პირით ულოცეს ფეხები” (ბოეზია, 1973, გვ. 100).

²¹ აპოკრიფი “**განძთა ქვაბი**” ადამის გაჩენაზე მოგვითხრობს: ღმერთმა გადაწყვიტა, რომ თავის ხატად და მსგავსად შეექმნა კაცი. “და ვითარცა ესმა ანგელოზთა ესე სიტყუაჲ, **შეშინდეს** და თქუეს ურთიერთსა, რამეთუ: დღეს ვიხილავთ ((საკრველსა)) დიდსა, რამეთუ მსგავსი ღმრთისა დაიბადებინ, ვიხილავთ მარჯუნესა ღმრთისასა... და რაჲამს ანგელოზთა იხილეს ხატი ადამისი დიდებულად, შეეშინა მისგან ხილვითა პირისა მისისაჲთა ((რამეთუ)) ბრწყინვიდა დიდებით, ბრწყინვალებითა დიდებისა ღმრთისაჲთა. და გამოვიდა, ვითარცა მზის-წყური, სიმაართე და სინათლე თუალთაგან მისგა და ვითარცა ალი ცეცხლისა, ზარი. და ვითარცა განერთხა გუჲამი ადამისი და შთაბერა სული... ადამ შეშინოსა სამოუცილო სამეფოჲად და დაედგა თავსა გურჯუნი მეფობისაჲ” უფალი მიმართავს ადამს, რომ ყოველივეს ხელმწიფებას მისცემს და მხოლოდ მას დაემორჩილება ყოველივე შექმნილი. შემდეგ ღმერთი ქმნის ევას ადამის ნეკნისგან და დაასახლებს მათ სამოთხეში. “და იხილა ეშმაკი, რამეთუ ადამ და ევა ილიდებიან სამოთხესა, განრისხნა სიბოროტითა თჳითა, რამეთუ შეშურდა მათი და შევიდა ((მუტელსა)) გუელისასა. აღილო ზე ჰაერთა გუელმან და მიიყუნა ეშმაკი სამოთხესა”

²² “**ცხოვრება ადამისი**” (უძველესი ტექსტი მე-17 საუკუნის ხელნაწერთაა შემონახული), ადამთან დიალოგში ეშმაკი თვითონ აღიარებს მისადმი მტრობის საფუძველს: “შენ გამო გამოვარდი მე ქუეყანად რასაცა დღესა შეიქმენ შენ, მასცა დღესა გამოვედი პირისაგან ღმრთისა, რამეთუ ოდეს შთაბერა შენ პირსა შენსა სული, გაქუნდა შენ ხატი და მსგავსებად ღმრთებისაჲ, და მოვიდა მიქალე და წარმოგადგინა შენ და თაყუანის გაცემინა ჩემ ღმრთისა”. და ჰრქუა ღმერთმან მიქალეს: შეგქმენ ადამ მსგავსად ხატისა და ღმრთებისა ჩემისა” მაშინ მოვიდა მიქალე და მოუწოდა ყოველთა ერთა ანგელოზთასა და ჰქრუა: “თაყუანის ეცით მსგავსსა და ხატსა ღმრთებისასა და ოდეს მოუწოდა მიქელ და ყოველთა თაყუანის გაცემინა, და მეტცა მომიწოდა და მე ვთქუ: “განმეშორე ჩემგან, რამეთუ უმრწემესსა ჩემსა არა თაყუანის ვსცემ, რამეთუ უწინა მაგისა მე უფალ ვარ და მაგის ღირს ჩემდა თაყუანის ცემად” ესე-ღა ესმა სხუთა ანგელოზთა ექუსთა, სთნდა სიტყუად ესე ჩემი და არა თაყუანის ცემად შენ. მაშინ განრისხნა დღერთი და უბრძანა გარდმოგედგად ჩემი და მათიცა ქუეყანად საყოფლით ჩუენით. ზოლო შენი უბრძანა ყოფად სამოთხესა მას შინა, ოდეს გულისხმა ვყავ, რამეთუ შენდამი გამოვარდი და მე ვიყავ ჭირსა შინა და შენ განსუენებასა, და მოგინადირე, რადთა უცხო გქმნა შენცა საშუებელისა მისგან საშუებელისასა, ვითარცა მე უცხო ვიქმენ შენითა” ამ სიტყვებზე ადამი ლოცვას აღავლენს უფლის მიმართ, რათა დაიხსნას იგი ეშმაკისაგან, ეშმაკი კი მაშინვე გაქრება: “მას ჟამსა უჩინო იქმნა ბელიარ” (ს. ყუბანეიშვილი, 1946, გვ. 5).

სწორედ ეს არის. ეს მოტივი, ასევე, კარგად ჩანს ორ ქართულ აპოკრიფში: “განძთა ქვაბი”²¹ და “ცხოვრებაჲ ადამისა.”²²

ქართულ ზეპირ გადმოცემებში თითქმის არ არის წარმოდგენილი ანგელოზების, უხორცო და უსქესო არსებების წარმოშობა. შედარებით ინფორმაციული ამ მხრივ აქართული ფოლკლორია, სადაც ღმერთი ჯინებს “წინწყლიდან” (ცეცხლის ნაპერწყლისგან) ქმნის.²³ მათ ადამიანის შეხედულება ჰქონდათ, მაგრამ მაქციობის უნარს ფლობდნენ: “წინწყლიდან ღმერთმა გააჩინა ჯინნი. გოუჩინა იმას დედალი ჯინი. ესენი დაცოლქმარდნენ. შეხედულება ადამიანის ქონდა, დამჭირდებიან, ხან ვირად იქცევიან, ხან ჯორად” (თსუფა: 16155).

ბიბლიური სატანის მუსლიმური ვარიანტის — შაითანის (არაბ. გაძევა, გააგლო, მოიკვეთა, ექსორია უქმნა — გ. ლობჯანიძე, 2006, გვ. 389) ისტორია გვხვდება ყურანის II სურიდან, სადაც ის ანგელოსთაგანია და ასევე XVIII სურიდან, სადაც პირდაპირაა მითითებული, რომ ის ჯინთაგანი იყო (გ. ლობჯანიძე, 2006, გვ. 390). გ. ლობჯანიძეს მოჰყავს ყურანის კომენტატორის, არ-რად იბ ალისბაჰანის განმარტება: “ჯინი ორი ტიპის არსებას ეწოდება. ერთი ისეთი სულიერია, რომელიც ხილული არ არის და ამ შემთხვევაში ანგელოზებიც და შაითანებიც ჯინის კატეგორიას მიეკუთვნებიან. ყოველი ანგელოსი ჯინია, მაგრამ ყოველი ჯინი ანგელოსი არ არის — (გ. ლობჯანიძე, 2006, გვ. 390). აქართულ ტექსტშიცაა მოცემული ანგელოზებისა და ჯინების დიფერენცირების საკითხი და მათი დინამიკა: ღმერთმა ჯერ ცეცხლისგან შექმნა ჯინები, მერე მათი ნაწილი — ლეზედილის მეთაურობით აიყვანა ცაში და ანგელოზობა მიანიჭა: “...დღესაც ანგელოზებად არიან. ძირს რომ დარჩნენ, კილო გამრავლდნენ, მარა აღარც გამჩენელი ღმერთი იცნეს. ეს ლეზედილი ცაშია. ძირს რომ დანაშაულობა ჩაიდინეს, ლეზედილს უბრძანა: თავი მუუყარე ძირს დარჩენილებსო. ლეზედილმა მუუყარა თავი აფრიკაში, ლეზედილს უთხრა, ზღვაში შეიო. ღმერთმა გამუუშვა ჯოჯონეთის წვიმა და ჯინები აქცია მუჰლად (ბარადოქსი — ცეცხლისგან შექმნილი ცეცხლით იწვევა — ე.ი.). ცეცხლმა დაწუა ყოლიფერი. ლეზედილი ევიდა ცაში და ათასი წელი ანგელოზებმა იარსებეს.

ღმერთმა თქუა, დედამიწაზე ხელიფე²⁴ უნდა გააჩინოო. ლეზედილმა უთხრა, ნუ გააჩენო, ვინ იცის, რაფერი იქნებაო. შენ რომ გაჯობოს, რას შობიო.

ღმერთმა მიანიც გააჩინა ადამი. სულის ჩადგამამდე ეშმაკი მივიდა და ნახა რაცხა გაკეთებული დერგივით. დუუბაგუნა ხელი და თქუა: - კი გაჩთება რაცხა ქვეყანაზე, მარა პატრონი აფერის არ იქნებაო (არცაა პატრონი); მერე ეშმაკმა დააფურთხა კიბის ადგილზე. ჯიბრაილმა (მთავარანგელოზი — მთქმელის განმარტება) ამოგლიჯა ეს ადგილი (მიწა), გადაავლო და აქეიდან

²³ “ყველაზე პირველათ სამოთხეში ეშმაკი გაჩნდა ცეცხლიდან, მაგრამ ეშმაკმა არაფერი სიკეთე არ მოიტანა. ამიტომ ღმერთმა წინასწარმეტყველებს უთხრა, რომ ადამი უნდა გააკეთოთო” (ზ. თანდილავა, 1990, გვ. 93).

²⁴ სიტყვა ხელიფე (არაბ. ხალიფას ვერსიაა, ნიშნავს შემცველი, მცველი - გ. ლობჯანიძე, 2006, გვ. 400) ადამიანის ფუნქციას აღნიშნავს, რაც ღმერთის შემცველობაში გამოხატება. “უთხრა (შენმა) უფალმა ანგელოსებს: მე დავადგენ ქვეყანაზე ჩემს შემცველსო” (ყურანი II, 28).

²⁵ აქართული ფოლკლორი იმითაც განსხვავდება ანთროპოგონის საერთო ქართული სურათისგან, რომ ადამიანის გვერდით მოცემულია ძაღლის შექმნაც: როდესაც წინასწარმეტყველები ადამის სხეულს შექმნიან, მას ეშმაკს აჩვენებენ. ის დააფურთხებს ადამს, რის გამოც, მას სამოთხიდან ავდებენ, ადამს დანაფურთხებს ამოკვეთენ და მისგან ძაღლს შექმნიან. ასე აიხსნება აქართულ ფოლკლორში ადამიანისა და ძაღლის განსაკუთრებული მეგობრული დამოკიდებულება (ზ. თანდილავა, 1990, გვ. 94).

ძალი გახდა და შეუყვება. ამიზა უყვარს ძალს პატრონი. ძალს რაც კაი აქ, პატრონს რომ ემსახურება, ანგელოზებმა რომ ხელი მოკიდა, იქიდანაა. ძალს რაც გლანა აქ, კაცს რომ ერჩის, ეშმაკის ფურთხიდანაა.²⁵

გამუშუვამ ღმერთმა მიწაზე ანგელოზები, ადამი გამოცადეთო. რაც კითხეს ადამს, ყოლიფერზე უპასუხა.

- რომ მიშლიდით, არ გააჩინოო, ახლა რაღას შობითო?
- ბოდიში, გამჩენელო ღმერთოო, - უთხრეს ანგელოზებმა.
- აბა ახლა ადიდეთო!

ანგელოზებმა ადიდეს, მარა ლეზედილმა არ ქნა, მე რეზა უნდა ვადიდო, თვითონ მადიდოსო. მაშვინ გადმუაგლო ღმერთმა ციდან ლეზედილი”.²⁶

სხვა აქარულ ვარიანტშიც განსხვავდება ერთმანეთისგან მელაიქები (ანგელოზები) და ეშმაკები - ჯინები. ჯენნეთში (სამოთხეში) “ეშმაკები ბევრი იყო. ღმერთმა მელაიქებს და ეშმაკებს უბრძანა, ელოცათ ადამისა და ჰევისათვის, რათა ჯენნეთში დარჩენილიყვნენ. მელაიქებმა ილოცეს, მაგრამ ეშმაკებმა არა. მათ თქვეს, რომ ჩვენ არ ვილოცავთ. მაგენი მიწიდან გაკეთებულა, ჩვენ კი ცეცხლიდან”.²⁷ როგორც მოსალოდნელი იყო, აქარული ფოლკლორი ყურანის მკვეთრ გავლენას განიცდის: “და აი, ვუბრძანეთ ანგელოზებს: თაყვანი ეცით ადამს! - და თაყვანი სცეს, იბილისის გარდა. მან უარყო, თავი განიდიდა და შეიქმნა ერთი ურწმუნოთაგანი” - (ყურანი, II, 32). შაითანი (სატანა)/იბილისი (ბერძნული “დიაბოლოს” - ეშმაკი - არაბული ვერსია) აქარულ ფოლკლორში შეცვლილია ლეზედილით.

გაამბარტავებული ანგელოზის თემა გვხვდება, აგრეთვე, რაჭულ გადმოცემაში: იესო ქრისტემდე დიდი ხნით ადრე ყველა, ვინც მოკვდებოდა, ჯოჯოხეთში ხვდებოდა. “ღმერთი რო არი ახლა, იმას ყავდა თორმეტი ანგელოზი. ე(ს) თორმეტი ანგელოზის უფროსი იყო ერთი და ყოველ დილას თორმეტივე ფეხებქვეშ უმღეროდნენ ღმერთს ალილუიას. ერთხელ უფროსმა უთხრაყვე დანარჩენებს: რად უმღერით ამას ასე სულაო, ქვე ჩემზე მეტი ძლევა კი არა

²⁶ იუდაისტური გადმოცემით (Bereshit Rabbati 70), როდესაც ყველა ანგელოზი უსიტყვოდ დაემორჩილა ადამს, სამაელი აპროტესტებდა, თუ რატომ უნდა დამორჩილებოდა ის ფერფლისაგან შექმნილ არსებას; ამ მიზეზით გააგლო ღმერთმა ზეციდან სამაელი, რომელიც გამოედო მიქაელის ფრთას და ლამის თან ჩაიტანა, მაგრამ ღმერთმა არ დაუშვა ეს (რ. გრეივისი, 2008, გვ. 120).

ეს მოტივი, ასევე, ცნობილია აპოკრიფში “ადამის ცხოვრება” (Vita Adae XIII, 1-16): სამაელი იეჰვიანებს ადამზე, რომელსაც დედამიწის ყველა მცხოვრები უნდა დაემორჩილოს, გადაიქცევა გველად და შედის სამყაროში. სამაელს არ სურს, რომ მასზე უფრო გვიან შექმნილ ადამს დაემორჩილოს, ამიტომ უბირსპირდება ღმერთს და სურს, თავი გამოაცხადოს უმაღლეს ღმერთად (რ. გრეივისი, 2008, გვ. 119).

²⁷ ქეთევან სიხარულიძეს თავის ნაშრომში “კავკასიური მითოლოგია” მოჰყავს ნოღაური მითი: “ღმერთმა მიწისგან შექმნა ადამიანი, მაგრამ ის ცარიელი იყო, როგორც თიხის ქოთან. ღმერთმა შთაბერა სული და ეს ქმნილება ნამდვილ ადამიანად აქცია. ღმერთმა გამოუცხადა ანგელოზებს (რომლებიც ზეციური სინათლისგან/ცეცლისგან არიან შექმნილნი ადამიანის შექმნამდე), რომ მან მიწის ბატონი შექმნა და მათ თაყვანი უნდა ეცათ ადამიანისთვის. ერთმა ანგელოზმა თავისი ამალით უარი განაცხადა: “არ ეკადრებათ ნათლისაგან შექმნილთ, ეთაყვანონ მიწისაგან შექმნილს” განრისხებულმა ღმერთმა ისინი ეშმაკებად აქცია და ქვესკნელში ჩაყარა, ყველა ქმნილებაზე უფრო დაბლა მოაქცია, ამიტომ განდევნილი ანგელოზები – ეშმაკები მტრობენ ადამიანს, რადგან იგი მიაჩნიათ საკუთარი უმედურების მიზეზად და ცდილობენ შემოქმედთან მის დამცირებას (ქ. სიხარულიძე, 2009, გვ. 232).

აქვსო. ეს გაიგო ღმერთმა და მის შემდეგ გაჩნდა ელვა და ბრუნუნის ქვეყანაზე. ღმერთმა ისინი გადმოყარათ მიწაზე. რომლებმაც თქვენი - შენი გიგალობებით, ისინი დატოვა, დანარჩენები კი გადმოყარა ღმერთმა მიწაზე. უფროსმა ეს არ უთხრა. გადმოავლო ის და წარმოიშვა მისგან ეშმაკი” (თსუფა: 25801); მესხური გადმოცემით, “ანგელოზებს ღმერთისთვის თავი უმდაბლებიან, ღმერთი უნდა ვადიდოთო. ღმერთს ამ ქვეყანაში ანგელოზები გადმოუყრია, ადამიანიშვილი გაუჩინია” (თსუფა: 3684). ვარიანტებში ჩანს, რომ ეშმაკი უპირისპირდება ადამიანს, როგორც მისი ზეციდან გამოდევნის ერთ-ერთ მთავარ მიზეზს. ზოგჯერ ეშმაკის დაპირისპირების მიზეზად შურია აღნიშნული, რომელსაც ადამის უზრუნველი ცხოვრება შეშურდება. აჭარული ტექსტი აღნიშნავს, რომ ადამი “შროლოდ სურნელებით იკვებებოდა” (მასვა: ბოზოყვათი, 1970),²⁸ რითიც ადამისა და ევას სულიერ საკვებზე გადატანილი აქცენტი,²⁹ ამავე მიზეზით უნდა იყოს სხვადასხვა ვარიანტში ადამის საკვებად ზეციდან ჩამოცვნილი ფრინველი: “ღღე მუდამ ჩამოდიოდა ზეციდამ გაფცქვნილი მწყერი”³⁰ (პოეზია, 1973, გვ. 102).

ედემის ბაღი. მიუხედავად იმისა, რომ ბიბლიურ ედემის ბაღს მრავალი ვარიანტი აქვს მსოფლიოს სხვადასხვა მითოლოგიაში, მათი მთავარი არსი იდენტურია: ღმერთმა თავდაპირველად ადამიანი უზრუნველი და ბედნიერი ცხოვრებისთვის შექმნა და ისიც ცხოვრობდა სამყაროში ჰარმონიულად.

ღმერთმა ადამი და ევა სამოთხის ბაღში დასახლა. ბიბლიაში საკმაოდ ვრცლად აღწერილი ედემის ბაღი. ასევე მრავალფეროვნადაა წარმოდგენილი ბიბლიურ სამოთხის ბაღი ფოლკლორში, სადაც ადამიანი უზრუნველად და განცხრომით ცხოვრობს:

“ადამიანს ედემი აქვს, ვერა ძლება სიტურფითა;
არცა იცის ტანჯვა რაა, არც მოკვდების სიტურფითა;
არცა იცის ტანჯვა რაა, არც მოკვდების სიკვდილითა.

შიგ შუა გულ ედემისა ტახტი იდგა ზურმუხტისა,
ოქროს ზოდის ფეხები აქვს, გუმბათია ლაყვარლისა.³¹

ანგელოზთა გუნდი გალობს, აღიდებენ შემოქმედსა” (პოეზია, 1973, გვ. 97).

“ადამ ნათლით შემოსილსა არ უნდოდა ტანსაცმელი,

²⁸ სამოთხის ჰაერით იკვებებიან ბიბლიური შესაქმის აფხაზური ფოლკლორიზაციის გმირები ადამი და ანამი. ისინი არ მუშაობენ, ჰყავთ სამი შვილი. აფხაზური გადმოცემა იმით გამოირჩევა, რომ მათ შვილები სამოთხიდან გამოძევებამდეც ჰყავთ (ს. ზუხუა, 1988, გვ. 154).

²⁹ ებრაელი რაბინები არაერთგზის აღნიშნავენ, რომ ადამისა და ევას საკვები ედემის ბაღში სულიერი ბუნების იყო, ცოდვით დაკეპამდე ადამი და ევა იღებდნენ ისეთ საკვებს, რომელიც მათ ფიზიკურ ბუნებას კი არ აღრმავებდა, არამედ სულიერად ამძლავებდა (მ. ვეისმანი, 1990, გვ. 60).

³⁰ ნ. შამანაძის დაკვირვებით, გაფრცქვნილი მწყერის სახე-სიმბოლო, რომელიც უზრუნველი ცხოვრების წყაროდ მიიჩნევა, სრულიად ახალია ქართულ ხალხურ შემოქმედებაში და, მისივე აღნიშვნით, არც სხვა ხალხთა ფოლკლორში დასტურდება (ნ. შამანაძე, 1973, გვ. 34-35). მწყერის სახე-სიმბოლო მოსეს ებიზოდის გამოძახილი უნდა იყოს ხალხურ ტექსტში, როდესაც შიმშილის გამო უდაბნოში ხალხი ნანობს ეგვიპტიდან წამოსვლას და უფლის ბრძანებით “საღამოხანს მოფრინდა მწყერი და დაფარა მთელი ბანაკი, დილით კი ცვრით იყო მოფენილი მთელი ბანაკი” (გამ. 16,13).

³¹ ებრაელ ხალხში არსებობს რწმენა, რომ ედემის ბაღში ანგელოზები უგალობდნენ ადამსა და ევას, ზოლო მნათობები - მზე, მთვარე, ვარსკვლავები, ცეკვავენ მათთვის. უფალმა თვითონ დაამზადა ძვირფასი მარგალიტებით მოოჭვილი მაგიდები, მოაწყო ხუფა, საქორწილო ბალდაზინი და აკურთხებდა წყვილს (მ. ვეისმანი, 1990, გვ. 65).

არც მუშაობა უნდოდა, სარჩო ჰქონდა ძველისძველი.

ლევ მუდამ ჩამოდიოდა ზეცილამ გაფრცქენილი მწყერი” (პოეზია, 1973, გვ. 102).

აკრძალვა-დარღვევა. ადამიანური ბუნება დასაზღვრულია სამოთხის ბალშიც კი და მას, მიუხედავად იმისა, რომ უზრუნველად ცხოვრობს და თავისუფალი ნებაც აქვს მინიჭებული უფლისგან, აკრძალული აქვს ხე ცნობადის ნაყოფის გასინჯვა. ფოლკლორში გამეორებულია აკრძალული ნაყოფის გასინჯვის მოტივი, თუმცა მონაცვლეობს თვითონ ნაყოფის სახეობა:³² ეს ხან ვაშლია, ხან - ლეღვი, იშვიათად - ყურძენი,³³ ხოლო აჭარულ გადმოცემებში ბურის კაკალსაც კი ვხვდებით: როდესაც გაბრაზებულმა ღმერთმა ეშმაკები ჭენეთიდან გამოყარა და შესვლა აუკრძალა, მათ მოისურვეს, ადამი და ევაც გამოეგდოთ ჭენეთიდან. “ერთი ეშმაკი გადაიქცა გველად და შეიპარა ჭენეთში. ადამიანის სახე მიიღო და ჰევას დაუახლოვდა. მან ჰევა შეაცდინა და ბურის კაკალი აჭამა, თან დაუბარა ადამსაც აჭამეო. აჭამა ჰევამ ბურის კაკალი ადამსაც. საერთოდ, ჭენეთში ბურის ჭამა არ შეიძლებოდა და გაბრაზებულმა ღმერთმა ორივე გამოყარა. ერთი აღმოსავლეთით გადაისროლა, ხოლო მეორე — დასავლეთით” (მასფა, ბობოყვათი).

აკრძალვის განსაკუთრებული შემთხვევასთან გვაქვს საქმე იმერულ ვარიანტში, რომელიც აკუსტიკურ ხასიათს ატარებს: ბრმა ადამსა და ევას ღმერთი უკრძალავს ვინმესთვის ხმის გაცემას. ადამი არ გასცემს ეშმაკს ხმას, ევა კი შეეხმიანება და შედეგად თვალები აეხილება. შემდეგ ეშმაკი ლეღვის რძეს მისცემს ევას, რათა ადამს თვალებზე მოუსვას და ისიც გაახელს თვალებს (მასფა: სამტრედია, ჩამწერი ნანა გეფერიძე). ხსენებულ ჩანაწერში ჭამის ფაქტი საერთოდ არ გვხვდება, მას ხმის გაცემა ენაცვლება, ხოლო ბრმა ადამისთვის თვალებზე ლეღვის რძის მოსმით ევას ძალადობაა ხაზგასმული.

საინტერესოა, რომ აკრძალვის სვანურ ვარიანტში ადამს და ევას აცდუნებს არა გველი, არამედ სამაელი (ეშმაკი) თხის სახით და ვაშლის ჭამას შესთავაზებს მათ (ბ. ნიჟარაძე, 1962, გვ. 139).

რასაკვირველია, აკრძალვის მეწყვილე ფუნქცია მისი დარღვევაა. ადამის მიერ აკრძალული ნაყოფის ჭამა შეფასებულია როგორც ურჩობა, რომლის გამოც პასუხი უნდა აგოს ადამიანმა. და ეს ერთი შეხედვით მარტივი მითი, რომელსაც ებრაელთა საღვთო წიგნი გადმოგვცემს, ნებისმიერი რელიგიის უმთავრეს პრინციპს - მორჩილებას ეფუძნება. ურჩობა იქცა ცოდვით დაცემის მიზეზად და არა გონებრივი სიჩქვილე, როგორც ხშირად განმარტავენ ადამის მდგომარეობას. ცოდვით დაცემამ ადამი დააშორა ღვთის ხატს, ნიშნავს ღვთის

³² ებრაულ მიდრაშების სხვადასხვა ვერსიაში განსხვავებული სახეობის ხილია მოცემული: 1) ყურძენი, რადგან არაფერს ისეთი ზიანი არ მოაქვს ადამიანისთვის, როგორც ყურძენს, რომლისგანაც ღვინო იწურება და რომელიც დამანგრეველად მოქმედებს სუსტ ადამიანებზე; 2) ხორბალი, რომელიც ადრე ხეზე იზრდებოდა - ის ცოდნის სიმბოლოა და ამიტომ შეიძლება უკავშირდებოდეს ხე ცნობადს; 3) ლეღვის ხე - ადამი და ევა ლეღვის ფოთლებით იმითომ შეიმოსნენ, რომ არც ერთმა ხემ მათ ფოთლი არ მისცა გარდა ლეღვისა, რომლის ნაყოფიც მათ იხილეს (მ. ვეისმანი, 1990, გვ. 71-75).

³³ ყურძენი ცნობილია ებრაულ ტრადიციაშიც: როდესაც ევამ ადამს ნაყოფი მისცა, თავიდან ის უარზე იყო, ხოლო შემდეგ ევამ მას ამ ნაყოფის წვენი მიაწოდა და დაეინებით მოსთხოვა მისი დაღვევა, მიდრაში ამბობს, რომ ადამმა ვეღარ გაუძლო ევასთან კამათს, მის ზეწოლას და დალია აკრძალული ნაყოფის წვენი (მ. ვეისმანი, 1990, გვ. 72-72).

ხატად ქმნილი ადამი სულიერად და გონებრივადაც უფრო ახლოს იყო ღმერთთან, ანუ უფრო განვითარებული, ვიდრე თანამედროვე ადამიანი.

დასჯა. როგორც ღმერთის მიერ აკრძალვას აუცილებლად მოსდევს მისი დარღვევა ადამიანისგან, ისე აკრძალვის დარღვევას მოჰყვება საპასუხო რეაქცია უფლისგან - დასჯა. უფლის მთავარი სასჯელი - უკვდავების დაკარგვა - ფოლკლორულ ჩანაწერებში იშვიათად გვხვდება,³⁴ ებრაული ტრადიციისგან განსხვავებით, სადაც მთავარი აქცენტი სწორედ უკვდავების დაკარგვაზეა გადატანილი: “როგორც კი შეჭამა ევამ ხილი, მას სიკვდილის ანგელოზი გამოესახა” (მ. ვეისმანი, 1990, გვ. 71); ის შეიბყრო ეჭვმა, რომ მოკვდებოდა და ადამს სხვა ქალს გაუჩენდა ღმერთი, ამიტომაც დააძალა ადამს აკრძალული ხილის გასინჯვა (მ. ვეისმანი, 1990, გვ. 72).

მიუხედავად იმისა, ქართულ ფოლკლორში სიტყვისიტყვით არის გადმოტანილი ღმერთის მიერ სამოთხის მკვიდრთა დასჯის პირობები (ადამი ისჯება შრომით, ევა - მშობიარობის სირთულით, გველი - მიწაზე ხოხვითა და კაცთა მოდგმასთან მტრობით), ინოვაცია ამ თვალსაზრისით მაინც გვხვდება. ხალხისთვის სრულიად მისაღები აღმოჩნდა სასჯელის ბიბლიური ფორმა, რადგან ის ემპირიული სინამდვილითა და გამოცდილებით იქნებოდა შთაგონებული თვითონ ებრაელთა საღვთო წიგნშიაც; რამდენიმე ვარიანტში კი ხალხური მთქმელი ცოდვით დაცემას ეშმაკის დამონებას უკავშირებს:

“ხუთი ათას წელიწადსა სასუფეველი დაკეტა,
გამრავლდა ურჯულოება, ჯოჯოხეთი დაახვედრა,
არ გაწყდენ წყალ-რღვნით, არ ცეცხლით
ყველა კაცსა დააყვედრა,
ადამის ჩამომავალი ეშმაკებს ყმად დაევედრა” (პოეზია, 1973, გვ. 105-

106).

სხვადასხვა კუთხეში სხვადასხვა დროს ჩაწერილი ქართული ფოლკლორული მასალის შეგვრებისა და ანალიზის საფუძველზე გამოიკვეთა, რომ ბიბლიური შესაქმის ებრაული ქართულ ყოფაში საკმაოდ გავრცელებული ყოფილა: გვხვდება როგორც პოეტური და პროზაული, ისე შერეული ტექსტები. მხატვრული თვალსაზრისით, ეს ტექსტები საკმაოდ მდარე ხარისხისაა, იშვიათად ვხვდებით ორიგინალურ მხატვრულ სახეებსა და მეტაფორებს, რასაც, უპირველეს ყოვლისა, ორი ურთიერთგამომდინარე მიზეზი აქვს: ბიბლიის ფოლკლორიზაციისას ნარატივს, ამბავს მეტი მნიშვნელობა ენიჭებოდა, ვიდრე ელემენტს, რაც თვითონ საკითხის მნიშვნელობით იყო განპირობებული; ფოლკლორში შემონახული ბიბლიური ცოდნა ხალხში ებიზოდების, სიუჟეტების სახით ვრცელდებოდა და არა დიდაქტიკურად, მიუხედავად იმისა, რომ საგანმანათლებლო ფუნქციას ასრულებდა. სალექსო ფორმაც ბიბლიურ ამბავს საზოგადოებისთვის უფრო მისაღებასა და ახლობელს ზედა, ხოლო რელიგიური მნიშვნელობისგან ის პრაქტიკულად დაცლილი იყო.

³⁴ერთადერთი გამონაკლისია აკაკის კრებულში გამოქვეყნებული მესხური ლექსი, რომელშიც უფალი ქერუბინებს მახვილებს აძლევს და ადამის დასჯას უბრძანებს: “ადამს ნულა შემოუშვებთ, არ ანახოთ მდინარები: ველარ ნახოს უკვდავება, ვერცა უკვდავი ბაღები” (პოეზია, 1973, გვ. 101).

დამოწმებული ლიტერატურა

თ. ბუაძე, 2014 - თ. ბუაძე, სულთმოფენობა, წიგნში: სულთმოფენობა, სერია — რჯული ქრისტესი, “ალილო”, თბ., 2014, გვ. 6-10.

რ. გრეივსი, 2008 - Роберт Грейвс, Рафаэль Патай. Иудейские мифы: книга Бытия. М.: АСТ, 2008. Пер. с англ. Л.И.Володарской.

მ. ელიადე, 1998 - Элиаде Мирча, Азиатская алхимия, Москва, 1998.

მ. ვეისმანი, 1990 - Рабби Моше Вейсман, Мидраш рассказывает, Берешит I. Иерусалим: «Швут Ами», 1990.

ს. ზუხბა, 1988 - ს. ზუხბა, აფხაზური ზებირსიტყვიერება, თბ., 1988.

ზ. თანდილავა, 1990 - ფოლკლორული მასალები — შეკრიბა, გამოსაცემად მოამზადა და შენიშვნები დაურთო ზ. თანდილავამ — სამხრეთ-დასავლეთ საქართველოს ზებირსიტყვიერება, X, თბ., 1990, გვ. 93-124.

გ. ლობჯანიძე, 2006 - განმარტებანი — ყურანი, არაბულიდან თარგმნა, შესავალი წერილი და განმარტებანი დაურთო გიორგი ლობჯანიძემ, კავკასიური სახლი, თბ., 2006.

გ. მახარაშვილი, 2004 - გ. მახარაშვილი, შესაქმის ლეგენდა აქარულ ფოლკლორში — კრიტიკიუმი, N 11-12, თბ., 2004, გვ. 155-156.

მეშკოვი, 1996 - მეშკოვი, Теория парадокса, Иерусалим, “Эрец Исраэль”, 1996.

ბ. ნიჟარაძე, 1962 - ბ. ნიჟარაძე, ისტორიულ-ეთნოგრაფიული ნაწერები I, თბ., 1962.

პოეზია, 1973 - ქართული ხალხური პოეზია, ტ. I, ნაკვთ. II, თბ., 1973.

ქ. სიხარულიძე, 2009 - ქ. სიხარულიძე, იბერიულ-კავკასიური მითოლოგია, თბ., 2009.

ფ. ფრეზერი, 1989 - Дж. Фрезер, Дж., Фольклор в Ветхом Завете. М.: 1989.

ს. ყუბანეიშვილი, 1946 - ს. ყუბანეიშვილი, ძველი ქართული ლიტერატურის ქრესტომათია, ს. ყუბანეიშვილის რედ., თბ., 1946.

ნ. შამანაძე, 1973 - ნ. შამანაძე, ქართული ხალხური ლეგენდები, თბ., 1973.

თ. შიოშვილი, 2010 - თ. შიოშვილი, სამყაროსა და პირველი ადამიანების შექმნის მოტივი აქარულ შესაქმის ლეგენდაში — ქართველი მუსლიმები თანამედროვეობის კონტექსტში, ბათუმი, 2010.

თსუფა - თბილისის სახელმწიფო უნივერსიტეტის ფოლკლორის არქივი.

მასვა - მოსწავლე ახალგაზრდობის სასახლის ფოლკლორის არქივი.

////////

ETER INTSKIRVELI**ON THE FOLKLORIC TRANSFORMATION OF THE BIBLICAL
-ANTHROPOGONY**

Anthropogony in folklore is chiefly related to cosmogonic myths. Georgian folklore mostly repeats the motives of the Biblical creation of the world. The given paper focuses on the comparative analysis of Georgian folklore and the Bible with regard to every stage of anthropogony – creation-prohibition-violation – punishment. Comparative analysis is also made with regard to Hebrew tales, Georgian and Coptic apocrypha, expressive-stylistic devices considered as folk innovations (the blindness of Adam and Eve, the clothes made of feathers, food etc.). Special analysis is made of Acharian folklore, which is a peculiar phenomenon within the Georgian folklore, due to the apparent influence of the Moslem religion.